

戊戌歲在楚獲覽鄭所南先生心史二冊胡漢人種之觀念涵入腦界凡十餘日不得自己甚矣先生遺文感人之深也篇末載先生尙有詩數卷苦尋海外不得意以爲東亞殆無刊本矣吾友漢南行日本書肆偶購殘籍三本閱之則先生詩集在焉大狂喜奔走告人飛函達於海外予亦急欲索觀又恐郵寄遺失反成巨恨疾勸漢南君刻之先生處元胡猾夏時代發爲詩歌追思趙宋字々皆成血淚嗟乎明季遺老不作二百餘年鳥獸同羣方諸先生身世其何以異他日皇漢人種恢復中土未始非先生詩歌一冊流風餘韻之所發導也刊刻者亦藉以弗衰矣

故國傷心總淚流
千年習井鐵函留
杜鵑啼血冬青死
石馬荒陵起暮謳

三春花鳥自年年
如此江山倍惘然
一樹叢蘭工寫照
着根猶自避腥羶

狂歌非效騷人怨
避地難忘祖國恩
一自遺編落東海
中原文獻不堪論

哽亂哀音極可傷
神州正氣未銷亡
同情剩有江南客
風雨煤山哭烈皇

哀江南客題

敘

凡讀書之士處乎今之世而穆然於宋之秀未有不知涕之何從者矣

帝轅北狩

宸極南臨辮髮易我冠裳縉紳甘爲臣妾流雲竄獸覩然視息之顏獻地墮城誰復撫膺之慟嗟乎愴懷乾浮之土跼蹐腥羶之區空山大哭猿木爲悽吾豈敢謂世無其人哉然何寥寥不一見也夜靜鬼語天涼夢秋往往與洪子俊先取所南臯羽二先生若詩若文詠之歌之悲風若酸山月皆苦感今昔之同時眎乾坤爲有恨夫指南二錄正氣諸歌尙曰大臣與國存亡若二先生者相府之幕僚明經之上舍耳死固爲烈生亦何慙而懷靈均乎九畹望夫君于湘流彼二先生者果何爲哉亦其感憤激烈之氣九死不移於君父而以成吾一是云爾然則使二先生者得攝尺寸之柄而盡其所欲爲踏殺天山之師平鋪遼水之流何多讓焉卽不然而綰符剖節必能爲睢陽守死以抗東南半壁之天下豈效夫首鼠偷生而昂然論列於士大夫之林者哉然吾猶恐夫不善讀二先生者謂夫險語破鬼高言螻蟻吾亦能之彼二先生者亦徒言之爾今其言



具在吾將以愧夫世之知讀二先生而而不克爲先生者
隆武改元冬古閩方潤敬題

合 刻

鄭所南謝臯羽二先生鐵函經晞髮集跋

國家之所以蟠固者人心倡人心以忠孝宇宙之所以撐持者士氣鼓士氣以文章斯爲迂宿之談而實不易之理也語云讀諸葛公出師表而不流涕者其人必不忠是知文章患未至耳至則諷詠留連感傷悱惻忠孝之念有不油然而生也哉吾茲誦鄭所南謝羽臯二先生之詩若文不勝泣然以悲也所南先生宋季一布衣耳連遼陽九世暗夷氣猶欲噓死灰于復燃廻狂瀾于旣倒迨數易勢窮齎志而老時發爲詩文鐵函重祕沉于淵井之中一往忠憤激烈之氣何其壯哉四百年來湮沒不彰一旦發其光怪泉土不能銷蝕又何神也尤其不漫出于幸治之時特見于崇禎

烈皇帝之世迺知先生精爽在天將以甲申之變天地皆慘神鬼痛號甚至犬羊亂羣羶風扇世冥冥中能無怒痾故適顯其遺史所云一人忠教百千萬人忠一人孝教百千萬人孝先王盟言爲不朽矣若臯羽先生之詩文古穆峻拔前哲論之已詳考其出處僅爲文丞相之幕僚乃能捐貲募士破家爲國忠誠鬱勃浩氣凌霄至事不可爲自

放于山巔水涯間每一念及則慷慨淋漓哭泣悲傷以死貞烈之性有足多者夫二先生皆閩產也今

聖明南御閩邦文武奮起掃腥羶而恢區夏先生之神實式臨之敬梓以傳俾夫世之讀二先生之文者廉狼立懦激高風于無窮卽敦古懋脩山林自好之士亦將有感于斯文

時

隆武元年歲次乙酉仲冬望日三山洪士升恭題于同文書院

承天寺藏書井碑陰記

崇禎戊寅歲吳中久旱城居買水而食爭汲者相摔於道仲冬八日承天寺狼山房濬智井鐵函重置錮以堊灰啓之則宋鄭所南先生所藏心史也外書大宋鐵函經五字內書大宋孤臣鄭思肖百拜封十字自勝國癸未迄今戊寅閱歲三百五十六載楮墨猶新古香觸手常有神護於是鄉先輩陸子始發明其書假鈔題識冀廣其傳同志中多興起者而諸生張國遂獻其書於

大中丞金華張公公覽而異之立捐俸繡梓并植碑井傍復擬搆祠置主顏其門時爲庚辰孟春云余惟先生卓行載在郡乘畫苑稱其畫蘭無坡意不欲着元土一染墨之微猶不忘君況此史係其親歷於悲歌涕淚中攷據纂輯者觀其誓詞足訂史訛其爲傳信無疑昔人寄慨陵谷至沈碑於淵思壽其功業而先生獨遭淪喪憤懣憶固無忘後世之知之也孰知一點血心上封泉遺三百年後復有起而表章之昭揭幽魂登厥琰琬如

張公者乎固見忠義不泯曠代相感而神物吐現有時良非偶矣書成其原本鐫度祠

中俾僧達始世守以梓本行贊成者鄉先輩文子

吾師張

先生暨友人張

而宗之爲記其緣起如此

茂苑陳記

衡郡文書

宋鄭所南先生自敘

文者三綱五常之所寄也。舍是匪人也。又奚文之爲哉。幼嘗問作文作詩之法於我先君子曰。古未嘗有所謂文也。惟古聖賢心正身脩德備行粹。見於興居踐履揖遜問荅之間。無非至文之文。安事章句乎。其或紀行事之實。其或發天理之祕。不得已而托於言語。爰詔天下後世爲聖賢歸本無作文意。此三代以上之事。自漢以來。專意詞章。言浮於理。才騁乎學。始文而爲文矣。至論古今忠臣孝子仁人義士。頗有不達文者。其躬行之事。乃六經言也。亦偉哉。或讀書作文之士。反不若之何耶。是故行者本也。文者末也。有行而無文。不失爲君子。有文而無行。終歸于小人行者。匪他三綱五常是也。悲今之人。委身汗下。誑辭欺世。將焉取材。汝欲爲文。必本之六經。立身三綱五常之天然。後熟讀左傳孟子莊騷賈董韓柳歐蘇之書。縱觀諸子諸史百家之說。養其氣質。老其才智。秉正大之論。揭大經大法。弘播天下一舉斯民同歸三綱五常之天。始無媿於爲文。若夫體製意欲新語欲簡。古森嚴有法度。主於理。勿流於鑿。庶不墮於綺靡卑弱。及乎出奇直與天地萬物相爲變化於無涯。庸以波瀾其才。苟不身之以道。惟務

言語爲工是委文爲技耳良可歎息詩之法祖於三百篇下逮曹子建陶淵明輩詩之律宗於盛唐主以杜兼之李次以孟浩然高適王維輩要在漱書史之潤益其靈根歲月至才華吐爲天芬其體製欲溫柔敦厚雅潔澗亮意新語健興趣高遠追淳古之風歸於性情之正毋爲時之所奪焉凡人之一言一動皆此心之形見者也果能先立其大者何往不可豈止文之與詩也耶蓋心之爲心廣大于天地光明于日月不可以小狹之不可以物犯之惟始終養之以正則庶幾乎夫如是無言則已有言則必可觀汝其行之思宵後質諸數千百載聖賢之書又以是衡鑑古今人事之變乃知我先君子教我者至哉言乎且汗漫湖海從天下士游固嘗見盡法度議論精微者然根本之論或遺之故終身所法惟學我父而已敬述所受以爲自序云時

大宋德祐五年歲在己卯正月十七日三山菊山後人所南鄭思肖億翁自序

宋鄭所南先生心史目錄

咸淳集 一卷

大義集 一卷

中興集 一卷

久久書 一卷

雜文 一卷

大義略序 一卷

後序五篇

正覺摩訶首羅天王療一切病咒

附刻卓行傳 見姑蘇志



總

目

終

鐵函心史引

鐵函心史稱出晉井此等之事上自孔壁不免人疑怪然此詩既怪矣文更怪矣則其所出之怪亦付之不問而可原本係晞髮集合刻今逸之因獨取怪詩怪文活字刷印以頒世之好怪者是小林泰輔之意也

文久癸亥三月嶺南學人保岡孚元吉甫識



鄭所南先生卓行傳 見姑蘇志

鄭思肖字億翁號所南連江人祖咸卒於枝江主簿父震字叔起淳祐道學君子爲安定和靖二書院山長有菊山詩集景定壬戌卒於吳葬長淵縣甌山思肖太學上舍應博學宏詞科侍父來吳寓條坊巷元兵南下扣閤上太皇太后幼主疏辭懇直忤當路不報初名某宋亡乃改今名思肖卽思趙億翁所南皆寓意也素不娶子然一身念念不忘君形言於詩文中如過徐子方書塾云不知今日月但夢宋山川題鄭子封寓舍云此世但除君父外不會別受一人恩寒菊云寧可枝頭抱香死不會吹落北風中贈人云天下皆變吾觀其不變惟其不變乃所以變其變者物也不變者道也又云古人重立身今人重養身者蓋超乎千古之上與天地同流於不知不識之天也養身者惜一粟以活微命役於萬物死於萬變者也何足道哉遇歲時伏臘輒野哭南向拜人莫測識焉聞北語必掩耳亟走人亦知其孤僻不以爲異也坐臥不北向福其室曰木穴世界以木字之十置下文則大宋也精墨蘭自更祚後爲蘭不畫土根無所憑藉或問其故則云地爲番人奪去汝不知耶不欲與雖迫以勢權不可得也天日本中峯禪林

之白眉聞思肖名欲見未果偶會於孝子梅應發家一見各默不語坐久之本忽云所南何不說法思肖曰兩眼對兩眼無法可說及別去本又云博學老子思肖卽曰世法和尙趙孟頫才名重當世思肖惡其宗室而受元聘遂與之絕孟頫數在候之終不得見嘆而去無何化其所居得錢則週人之急田又捨諸剝惟餘數畝爲衣食資仍謂個客曰我死則汝主之蓋不以家爲矣自是無定跡吳之名山禪室道宮無不遍歷多寓城之萬壽覺報二剎疾亟時囑其友唐東嶼曰思肖死矣煩爲書一位牌當云大宋不忠不孝鄭思肖語訖而絕年七十八蓋其意謂不能死國與無後也自贊其像曰不忠可誅不孝可斬可懸此頭於洪洪荒之表以爲不忠不孝之榜樣宋社旣墟適意緇黃自稱三外野人嘗著大無工十空經一卷空字去工而加十宋字也寓爲大宋經造語奇澀如度詞莫可曉自題其後云至思肖嘔三斗血方能書此後當有巨眼識之又著釋氏施食心法一卷大極祭煉一卷謬餘集二卷文集一卷自敘一百二十圖詩一卷

咸淳集

三山菊山後人所南鄭思肖億翁

題多景樓

時叛將劉
整圍襄陽

英雄登眺處一劍獨來遊
男子抱奇氣中原入遠謀
江分淮浙土天濶楚吳秋
試望斜陽外誰寬西顧憂

逢陳宜之

義伯

行李苦役役相逢古潤州
千金一夜醉四海十年遊
山靜鬼行月宵涼人夢秋
近聞邊事急吠畝得無憂

送友人歸

年高雪滿簪喚喚渡浙江
潯花落一杯酒月明千里
心鳳凰身宇宙麋鹿性山
林別後空回首冥冥煙樹深

越州飛翼樓

飛來絕頂上流眄入無垠
國土東南濶山川今古新高樓
臨白日平地載青春直欲蓬

葉去因風問大鈞

書懷寄孟耐翁

正傳

弓冶學不就悠悠信所之坐看浮世夢吟白少年髭樹冷巢營鷗山晴角解舉觀茲歲
又晚而我獨何爲

山中聞鶴

涼夜坐巖石飛來白鶴鳴星流銀彈過月碾玉輪行萬里思不極一天秋更青欣然有
所得長嘯度蓬瀛

遊觀音山懷鄉僧貫月溪

天地一閑人孤雲自在身去來心不礙語默意俱深山疊千層樹花連四望春舊年同
笑語今日獨登臨

重題多景樓

時逆賊劉整闇
襄陽已六年

無力可爲用登樓欲斷魂望西憂逆賊指北說中原糧運供淮餉軍行戍漢屯何年遂
所志一統正乾坤

送人之官

爛醉擁貂裘揮鞭跨紫驢客途寒色重邊地月華愁旌旆開前道江山指別州相逢俄作別滄海一虛舟

僧房夜坐

說到死生處令人羨出家法身終不壞濁世自無涯梵夾金銷字經簾綵散花擁爐待月上溶雪煑春芽

聽琴

洋洋盈耳間一派水潺潺意不隨聲盡心應與物閑宿雲穿竇出飛鳥御風還却喜無人識支頤看遠山

寄友人

御街暫分手相憶兩相望生意隨春動新詩入夢香九天饒雨露一水貫蘇杭地控衣冠會聲名日日彰

別故人

拍馬又登程餘酣尚未醒曙蟾消淡白秋漢覆空青江走游龍勢山蟠睡虎形飄零毋感歎天地亦浮萍

就泛省留別

歌聲送晚酒忽忽頗快青霄志已通燈火幾年成舊業文章今日試新功九天宮闕春城曉萬國輪蹄輦路風每念蒼生受辛苦願爲霖雨白雲中

夏駕湖晚步懷古

吳王夏月車駕避暑之地

豈獨吳王事可憐人生回首總淒然空嗟落日猶如夢不記東風幾換年寶駕跡消前古地菱歌聲斷晚涼船如今城郭都遷變茅屋荒蕪草積煙

睡覺有懷寄王梅塢垓

向年治亂屢興懷此日清閑獨把杯千古英雄人不見一樓風雨夢初回空中變化觀龍見世上淒涼誤鳳來須入山林了生死莫將心迹付塵埃

送人之所在

歌斷陽關奏暮笳東風吹客向京華三更舟度淞江月一路春連上苑花地逼星辰黃

道近山環宮殿紫雲斜
茲遊歸計須宜早
莫遣相思夢遶家

飄零

飄零書劍十年吳
又見西風脫盡梧
萬頃秋生杯後興
數莖雪上鏡中鬚
晴空濶浮雲盡
破屋荒涼俗夢無
惟有固窮心不改
左經右史足清娛

懷歸

突兀高樓落照閒
此身迴出俯人寰
客心不逐年華老
詩興何曾月夜閑
峽水流歸天際海
淮雲飛度浙中山
杜鵑啼後歸舟發
只有春愁滿載還

南山老松

凌空獨立挺精神
節操森森骨不塵
半夜波濤驚鶴夢
幾番風雨護龍身
心貞寧受歲寒變
氣老常涵古意新
終見取爲梁棟去
紫煙空鎖碧磷磷

卽事

河朔杯多席莫逃
碧筒製酒飲兒曹
雨餘地潤南風爽
秋近宵涼北斗高
月下夢歸吳苑路
天涯心遶浙江皋
靈均仙後無人怨
誰肯明時賦續騷

訪隱者

石竇雲封隱者家一溪流水遶門斜滿山落葉無行路樹上寒猿剝蘚花

春日登城

城頭啼鳥隔花鳴城外遊人傍水行遙認孤帆何處去柳塘煙重不分明

春詞

春氣喧妍御夾紗玉釵雙裊綠雲斜倚欄看遍庭前樹盡是枝頭結子花

懷友

今日樽前忽憶君爲憐秋事又平分坐來凝睇西風久過盡天邊數片雲

春日遊承天寺

野梅香軟雨新晴來此閑聽笑話聲不管少年人老去春風歲歲闌闌城

贈老王道人

曾宴瑤池王母家瞳方鬢黑臉凝霞休將甲子來相問知見蟠桃幾度花

書蘭亭帖後

千載流芳禊事餘
鼠鬚筆法重璫璵
晉人多喜清虛話
不及蘭亭一紙書

湖上漫賦二首

薜厓蒼潤雨初乾
石罅飛泉噴雪寒
啼斷禽聲山更靜
青松影下倚欄干

其二

一望湖光鏡面平
暮鴉過盡斷霞輕
千巖萬壑無人迹
趺坐松柯月月生

仙興

跣足蓬頭爛碧瞳
劃然長嘯響天風
千巖萬壑無人迹
獨自飛行明月中

詠懷二首

讀書陋巷中
愚直與時忤
一鶴仰志鳴
志不在塵土
有懷諸葛公
默然不發語
後世無斯人
清風激千古

其二

居屋雖不大
終日心閑閑
口誦聖人書
立身仁義間
俯仰無愧怍
茲道誠爲難
君子常進德
小人儉自安

其三

驅車欲出門獨立眺虛曠恣意杯酒間舞劍心悲壯雖在寂寞濱心實千載上天地固寥廓亦當定所向

吳江垂虹雨後觀荷

睡龍瞠目開射光馮夷宮翻身弄變化噴水濕洪濛浪花捲寒雪斜噴清冷風雨歇龍歸來波心臥晴虹淨洗秋色出霽景涵青空爍爍錦炫晝新綠妬嬌紅濕香吹不飛戀抱花心中醉面仰天笑月照三吳東

虎丘

何年海湧來霹靂破地脈裂透千仞深嵌空削蒼壁山潤石乳甘秋冷鐵花碧闔閭雲空愁銀虎去無迹蛟龍鎮奇險拱護梵王宅

寄蕭梅初二首 皆吾

韞匱玉未售妄想夜生夢風霜鬢鬢鬢談笑氣湏洞上天宮闕高凡身血肉重顧影無其儔一呼四壁動抱茲忠義心慚與猿鶴共

其二

雁聲杳然來壯心惕然躍委身坐枯靜飛語亂冥漠曾學屠龍技豈受龜手藥學成無所用舉世亦錯愕孰云方寸微天地入籠絡春潤花無邊雨驟雲不薄不齊臯夔肩當跨孤飛鶴

觀雪

吾獨愛觀雪心與雪同色清興匝空朗或語或時默李白有狂才飛筆寫無極驚倒天上人世間曉不得

古詩三首

筆田不豐年百巧皆畫餅宿火潛永耀奚慕脫囊穎汲古飲玄味至妙終身領虛懷抱空明爽語吐清冷不將白日身浪走紅塵影何當踏雲飛始信驂騑猛

其二

醉歌京華春行邁心搖搖孤雲未致雨隨風南北飄王國天地極幹運四海遙城中百萬戶飛簷挿紫霄傾金買諛噓仰面氣宇驕不重讀書人研苦坐寂寥我欲封綠章天

門高岩嶢豈抱浩然氣長年面漁樵

其三

蒼蒼碧玉盤烏兔東西越一氣母羣兒各弄性情妙雷動蟄龍飛天老哀猿弔俯首問
洪濛萬古一長嘯

秋歌

涼風捲地吹秋來秋之爲氣何清哉紫蕭露華浴萬宇星神欲駐難徘徊今年舍我去
者二百二十有五日今日之後誰使來日來相催琥珀滿卮發越清奇萬物脆而易化
五官靈而多知一世之間幾千萬人一人之心幾千萬變碎裂神氣紛云爲液槁矣而
告憊氣翻然而相辭適之變化不知其誰氣母一丸空虛跳躍金浮木沈老怪消鑠我
之變化亦不知誰蒼蒼茫茫萬萬古玄曠燭歛夜不替醉中喚秋與秋語秋辭淒脆咽
不吐忽欲騎鯨汗漫遊海藏飛出白玉鼓

春歌

去年秋日作秋歌。今年春日奈春何。往春疊疊疊萬古。來春冥冥春更多。青皇旌旆

開天衢。三、八、二、十、四頭蒼龍車。大開東方宮殿坐。八荒之內交相賀。紅紫茸茸爛如纈。面首柳花撲晴雪。造物弄人祇片時。弄死世人人不知。我心清冷湛無邊。流光瀕洞先天先。前身本在未鑄日月前。黃面瞿曇。長耳老明。乃吾無量劫後之孫。後身復現擲碎虛空後。當知所南先生爲無量劫前之祖。人生精魄假合舞幻。忘紛如氣。九越塵土。紛然而來。託爲形。飄然而去。若無主。今日之今。霍霍翾翾。少焉矚之。已化爲占。胡爲墮影黃酒浦。獨坐翛然看春雨。山蒼蒼。水茫茫。百歲劫劫太極長。我來濯形白雲鄉。大笑世上生顛狂。醉筆作歌字不訛。宛然蒼蛟老蜃勢相拏。

琴女行 並引

有隣家女歲未笄。點兮容鄙舊章之汙耳。慕古意於無窮。鼓幽寂兮曠宇。生風孤思。貞潔兮月走碧落之方中。於是時兮身若不肉。冷然飛仙。遺雜響於衆聽。抱孤情而獨妍。彼冰雪之際兮。奚顧芳菲分春而爭憐。輒引而賦。

嫦娥開殿當高青。白光染夜生空明。望中泠泠瑩如水。碧透肉鏡雙瞳子。窄袖籠春玉筍嬌。援琴一鼓秋瀟瀟。瑤池女子旨趣別。紫清吹下太古雪。雙鬟翠膩縮香霧。臨風欲

控青鸞羽應悔思凡謫塵土長向花前憶王母

遇秋澗

虛襟吐洩山川秀擒勒造化歸雙手玄雲飛雨破青空聳動萬象鬼神走我昔先人
遊荊州曾同君醉江漢樓手捉明月入口吞足踏清風跨海遊于今二十二年後古吳
國中相邂逅先人雖負一代名不似先生今白首

雪中醉題

玄雪冥冥凝不飛。朔雪灑灑晴還落。水神恣意弄奇怪。宇宙一白陰風惡。南州客子
心飄飄。狂發長歌破寂寥。醉中瀏亮金石聲。精神秀發意氣驕。故人睨目嗔我怪。撫
掌人笑羣兒駭。我家萬卷列中堂。古人顛怪皆曾載。須臾酒醒那得知。索紙落筆蛟
龍飛。明曉火輪飛出海。來見壁上新題詩。

前雪歌

玄冥玄玄又玄玄。一夜一尺平階前。故現幻化瞞俗眼。忽變境界爲神仙。彌望潔淨失
汗穢。與世坦蕩忘歎偏。混沌有影晝短短。穹窿無縫雲懸懸。慢飄如倦欲止歇。斜灑似


舞爭便儼。萬物根蒂不可見。數筆圖畫安能傳。詩戰素手白相敵。酒潮赧臉紅不鮮。老
龜縮殼息飲氣。臥龍哆口寒凝涎。木帝拾暖施下土。火精飛馭行中天。須臾被野盡錦
繡。四望四野春無邊。

後雪歌

不知今日是何年。忽然生白照無邊。全體瑩淨妙無象。還我大極未分前。開口大笑說
不得。一日一夜獨自顛。與君同此光明域。有辭難鑄玄中玄。醉吐大語吞六合。前古朽
言無光鮮。浩然之氣開虛空。舉頭渺渺皆青天。

歲旦登萬佛閣觀雪

赤脚踏上萬佛頂。全身坐斷清淨境。見大光明徧法界。不見三千大千影。一時八面俱
玲瓏。諸塵諸相本無蹤。色不是空。空不空。瑩然塞破虛空中。怪見此番寒徹骨。無中弄
得光芒出。嘉地省得大年朝。即是正月初一日。



宋鄭所南先生自叙

予幼好吟長而尤苦於吟自景定以來至咸淳五年所作極多離亂之際併所著散文盡失之今記憶者惟詩五十篇目曰咸淳集姑存舊也厥後數載竟不作欲天其隱德祐乙亥冬有不可遏之興時輒作數語以道胷中不平事至於丁丑歲擇七十篇目曰大義集每一有作倍懷哀痛直若鋒刃之加於心苦語流出肺腑間言之固不忍然得慷慨長歌雖暫舒氣終則何如嗚呼痛哉堯舜之聖非吾君也況於湯武又況於非湯武者乎

三宮在北

二王在南撫卷一慟天回日低天乎天乎其果無知乎九州名山大川頗有磨崖石日泚筆以俟大書特書焉願與我以時卒不悖於我

先君子之所教云時

大宋德祐五年歲在己卯正月廿一日景定詩人三山所南鄭思肖億翁自序



大義集

德祐初年乙亥十二月初二日寓吳陷虜時我年三十五

景定詩人三山所南鄭思肖億翁

火德

火德續正統東南氣運昌
雒京都赤帝魯史筆天王
八極開清曉羣星避大陽
謳歌今有在歷數永無疆

德祐二年歲旦二首

時逆虜未犯行在

力不勝於膽逢人空淚垂
一心中國夢萬古下泉詩
日近望猶見天高問豈知
明朝向南拜願覩漢旌旗

其二

有懷長不釋一語一酸辛
此地暫胡馬終身只宋民
讀書成底事報國是何人
耻見干戈裏荒城梅又春

我生

我生逢叔世凡事倍辛勤
漢鼎亂猶在胡笳愁不聞
好花嫌朔雪回雁避南雲
無奈浩

然氣臨風歌古文

春雪中作寄蕭梅初皆言

春來頻下雪彌望漲凝陰無地可容足有天能見心
峩冠甘虜笠正語化蠻音何日得
隱去深山深更深

寫懷四首

天命尙屬漢大夫空美新 三宮猶萬里一念只孤臣
淚盡眼中血心狂夢裏身勿云
今已矣舉首卽蒼旻

其二

未能歸 趙壁我不厭干戈萬古青天在三年白骨多
春風仍歲月世界自山河寧忍
委 國難飛身入薜蘿

其三

北虜昔深入東甌亦未曾江山能幾戰風雨廢諸陵
雲盡喜天出宵殘願日升蒼蒼今
悔禍識應 兩中興

其 四

不信夜不曉哀哀鎖暗鑿鐵城蹲敗土

時虜人悉平所得州郡城郭

錦國漲腥塵草泣荒宮雨花羞

峭地春少焉開霽色四望一時新

贈 僧

澹然無所著暫走世間塵羅漢來東土將軍現後身
語香清淨法心苦亂離春曾得拈花意縱橫變化新

獨 釣

高興一絲在清風萬古長不爲周呂望願似漢嚴光
天下皆秋雨山中自夕陽後來有孺子終久辨滄浪

書前後臣子盟檄後

死亦烏可已丹心闡大猷恭承 父母教用剪 國家讎
日破四洲夜天開六幕秋

終當見行事不與世同流

墨 蘭

鍾得至清氣精神欲照人抱香懷古意戀國憶前身
空色微開曉晴光淡弄春淒涼如
怨望今日有遺民

曉晴

兩晨輝朗霽一碧湛無垠草木新容淨林巒遠意分
海生東出日天散北飛雲却喜風
猶競微涼透夏薰

晚晴

落照開空霽明霞映水鮮乾文懸造化土脉潤山川
白滿重圓月青還不翳天定鐘聲
更徹通昔喜無眠

此心

此心期不變曾灑血爲盟舉世無人識終年獨自行
海中擎日出天外喚風生淨盡去
雲霧重開白晝明

卽事八首

舉頭雲蒼莽何以喻吾懷白眼世無偶青天路可階
湘蘭終戀楚吳橘不踰淮龍臥未

雷雨池塘空沸蛙

其二

棲遲破屋下書史自徜徉道不嫌清苦人皆笑獨狂
晚花虧雨露老樹慣風霜莫望閭門北愁雲天外長

其三

一說乾坤事無愁鬢亦斑心飛空濶外身隨亂離間
日落經何國歸雲識故山憑誰扣冥漠天道幾時還

其四

徉狂全性命守死混樵漁道否懷才老心高涉世疎
掌中籌地理燈下論兵書愧我非諸葛何人顧草廬

其五

山川不可望荒草苦何深故國英雄淚終身父母心
清池函瑩玉落日隨圓金休閒愁多少芳年雪上簪

其 六

薰風吹不透熱惱苦無涯時異生深恨雲飛動壯懷醉譚天下事清坐月中階此意有誰解兒童自聽蛙

其 七

大地盡戎馬皇皇奚所之此身猶夢裏無處問天涯烏影驚飛彈蟬聲避過旗願言仍舊貫生死太平時

其 八

獨閉衡門坐無言意極長赤心懷 趙日綠鬢染吳霜火正當陽地風來自午方連宵

驗天象心宿炳明堂

心宿明堂
古宋分野

宿半塘寺

一襟青氣足此夜豈人寰醉影松杉下吟身風露間秋懸當殿月雲宿近城山明發騎鯨去飄然不可攀

對雨有懷

世道忽翻覆愁來痛徹心腥風行殺氣淫雨哭秋陰虜睨
朝廷靈官空帑藏金 妃
嬪今草地宮髻淚中簪

次 韻

冥迷江樹外一鳥破雲還雨雪乾坤變干戈筆硯閑命于時不偶心與道相關終見二
三月花邊展笑顏

自

輓德祐乙亥臘作

堂堂男子不封侯與命爲仇死未休陷虜有歌春夢斷哭天無地夜魂愁九青風露極
玄處萬古虛空自在遊痛恨莫能生報 國從今陰隲溥南州

一 旦

一旦蒙塵朔漠行杜鵑哭破舊冤聲金杯暫飲胡瓶酒玉鉉誰調御鼎羹故國夜長天
正晦離宮春盡草初生小臣有誓曾銘骨不到神州不太平

偶成二首

劍氣熒熒夜屬天忍觀禾黍廢蒼煙夢中亦問

朝廷事詩後唯書 德祐年花柳有愁春正苦江山無主月空圓如今好棄毛錐子望
北長驅馬一鞭

其二

曾受家傳究典墳自期不與俗人羣 君臣位亂綱常在 父母恩深生死分霽日行
空鎔積雪長風吹曉淨殘雲坐令世上春光好長使桃花笑臉醺

答

語聲帶咽吐新詩徹骨銜冤痛不知報國心惟憂漢賊讀書人肯學胡兒劍携入手霜
三尺鏡掛當胸月一規終久難磨天理在匪伊談笑定時危

雁足

雁足冥冥未報歸此心裂碎有誰知一懷憤悶心銜苦兩鬢藍髮倒垂醉後愛歌諸
葛表生來恥讀李陵詩喜吾筋力猶強健願爲 朝廷理亂絲

次韻

百歲光陰十過三故山路梗夢中還看來身在終爲累悟得心空始是閒幾度踏雲歸

草屋有時臥雨掩松關人間轉瞬皆陳迹何必長生久駐顏

其二

活計煙波羨謝三醉眠釣艇去仍還爲憐死者今何在笑殺茫然不識間燭影欲殘登夜榻鼓聲未絕啓晨關匆匆役役塵中走一見青山一慟顏

其三

花前歡笑憶春三何故東君尙未還一寸心中千種事百年世上幾時閑虜遷玉帛猶歸市馬犯金湯即棄關生怕朔風吹下雪飛來點鬢妬紅顏

古時

古時明月碧霄間曾照鸞輿幸蜀還御坐乍空

三殿遠朝儀暫歇六更閑馬屯腥霧彤墀壞鶯哭冤春玉戶關若是年年歸舊燕邊簷偷語問龍顏

補夢中所作

夢作一絕覺而遺首兩句君王二字夢中作中原二字嫌其忘於本朝改而足之

鴻雁流離夢亦驚滿懷淒怨足秋聲此身不死胡兒手留與 君王取太平

聞陷虜宮女所問

塵汗宮粧粉不香死生魂夢只昭陽一逢人自南來者垂淚殷勤問 二王

題陶淵明集後

拂袖歸來未是遲傳家何用五男兒不堪生在義熙後眼見朝廷被篡時

秋雨

雲滿長空雨滿山淒々風色值新寒夜來白帝將秋去萬樹淋漓哭不乾

逢故人

曉路雲埋撥未開霜風空老棟梁材平生不識悲秋事今日白頭何處來

秋成

秋成田里自人煙刁斗聲中又一年王莽貨泉成底事東都仍用五銖錢

北望

紫塞風高直北秋黃河水自向東流穆王御馬還宮日海內封疆只屬周

南望

南陽遙望見春陵殘雪初消霽日升
鬱葱有佳氣漢家天子必中興

匈奴

匈奴殘破漢封疆江北江南盡戰場
若問生靈誰是主如今天子又康王
康王本朝高宗皇帝

絕句十首

羊裘獨釣浙江濱百姓哀哀苦亂離
但得漢家鴻業在莫愁光武奮身遲

其二

目斷秋江欲暮時天邊落葉弄愁飛
翠華幸北平安信只願新鴻帶得歸

其三

玉輦愁經草地腥酸風頻捲馬頭塵
我朝三百年忠厚不信山河屬別人

其四

閭門城外水涵空雁影淒涼落照中
一望秋風數千里不知何處是行宮

其五

草木恩深雨露餘公卿環列漢庭居一朝投閣千年笑却是揚雄不讀書

其六

一葉飛秋萬樹寒行吟憔悴倚欄干淵明只憶晉朝事滿眼黃花淚不乾

其七

銀漢斜傾玉漏殘釵蟲熠々照青寒最憐今夜下弦月一半婆娑樹不全

其八

縱笠氎靴搭護衣金牌駿馬走如飛十三門裏秋光冷誰夢朝天喝道歸

胡爵

行在十三門搭護胡衣名金牌

其九

西風滿路奈愁何昏鼓聲中厭北歌菱藕市空燈花斷一城秋怨月明多

其十

子夜神遊碧落間羣仙飛語下人寰上天深念蒼生苦特勅三宮聖駕還

五忠諫

制置李公帶

公之忠義最烈古所未之有聞未及其詳故未敢書今虜亦祠之矣
舉家自殺盡忠臣面仰青天哭斷聲聽得北人歌裏唱潭州城是鐵州城

亟相李公庭芝

公受刑後書吏夏徵冒險白於虜酋阿朮丐公之屍歛棺葬於楊州堡城司空廟後
人皆危之徵亦義士也

大駕迢々已北行淮南猶守九州城只謀渡海南歸國不意忘軀博得名

察使姜公才

公至死罵賊不絕口且劇口罵夏貴李公庭芝爲淮東制置姜公爲制置府都撥發
官凡李公得堅守淮東死爲忠臣者皆姜公之力也

殺氣盤空白晝陰始終不變似精金直疑碧落三更月來作將軍一片心

都統王公安節

節使王堅之子在常州與賊戰所部三百軍皆陷公雙刀孤戰殺賊不計數賊嘗擲

示十萬戶金與牌之不受口則罵手則殺以馬失利而死虜賊咸稱其能死戰也
健兒三百陷胡塵匹馬孤騰勇過人至死執刀唯罵賊自言不作兩朝臣

隨駕內嬪某氏

隨駕北狩內嬪某氏虜酋屢欲犯之以其吐語貞烈竟不可得乃書於裙帶上曰誓
不辱國誓不辱身遂自經於虜館死後爲虜人分爨其肉食之

玉殿辭春陷馬塵忍將羶穢污貞身能行男子難行事羞殺朝中投閣人

寄同庚友

淳祐初年同下生已經三十七番春此身雖墮胡塵裏只是 三朝天子臣

卽事

旅瑣曾聽月下猿至今觸事卽愁端北風昨夜無情甚又作冬來一信寒

小春花

天地無情正北風飛鴻哀咽亂雲中此時縱使開千樹不及東皇一點紅

對菊四首

天風吹古秋獨立殿寒馥我父昔愛之終身不忘菊

其二

受命太極前立身晚秋後一朝揚清香名動天下口

其三

日月雖云逝山中秋自香平生抱正色誰怕夜來霜

其四

三逕今非昔多愁老此身誰知陶靖節只是晉朝人

陷虜歌

德祐乙亥十二月廿八日作又名斷頭歌

德祐初年臘月二逆臣叛我蘇城地城外蕩蕩爲丘墟積骸飄血彌田里城中生靈氣如蟄與賊爲徒廿六日蚩蚩橫目無所知低面賣笑如相識彼儒衣冠誰家子靡然相從亦如此不知平日讀何書失節抱虎反矜喜有粟可食不下咽有頭可斷容我言不忍我家與國同休三百十六年閱歷凡幾世忠孝已相傳足大宋地首大宋天身大宋衣口大宋田今棄我三十五歲父母玉成之身一旦爲氓受虜塵我憶

我父教我者日夜滴血哭成癩我有老母病老病相依爲命生餘生欲死不得爲孝子
欲生不得爲忠臣痛哉攤胸叫大宋青青在上寧無聞自古帝王行仁政唯有我朝
天子聖老天高眼不昏花盍拯下上蒼生命忍令此賊恣殺氣顛倒上下亂綱紀厥今
帝怒行天刑一怒天下淨如洗要荒仍歸禹疆上四海草木霑新雨應容隱者入深密
歲收芋栗供母食對人有口不肯開面仰虛空雙眼白

狂歌

一笑識破天地根隨意變化易其名俯仰三十六天中主宰一氣生羣生條歟有怒行
號令億兆雷鼓轟天聲勅喚龍口敷滴水淨洗世界冷然清推出火帝照寰宇萬萬萬
世長光明

宋鄭所南先生自序

夫詩也者心之動也其動維何因所悅所感所憂所苦觸之爾一動之天多事之源也苟知動而無動則不爲動之所動矣今八荒翻沸山枯海竭身於是時能無動乎夫人之生性於天之清明形於地之重厚我主乎其中天地萬物莫不俯首爲賓是我之所得者甚大也奚自小之乃不君其君外走逆亂之區盲其主反臣於賊求活焉惡俗滔滔爲江爲河不可禁止傷如之何我雖無知寔不敢與賊走而俱化故哀痛激烈剖露肝膽灑血誓日期毋渝此盟五六年來夢中大哭號咷太宗蓋不知其幾此心之不得已于動也夫非歌詩無以雪其憤所以皆厄挫悲戀之辭我之所謂詩者非空寄於言也實終身不易之天也豈徒詩而已哉澤畔孤吟鬼然其形心乎一脈之生眇然千冰萬雪之下微微綿綿不絕若縷窮陰戮力殺之終不可得而殺此一脈之生將大而爲天地萬物生生無窮之生也歟以天道人事驗之 中興迫矣故曰中興集時
大宋德祐六年歲在庚辰四月十五日景定詩人三山所南鄭思肖億翁自序

中興集



中興集卷之一

已卯夏後至庚辰八月所作

景定詩人三山所南鄭思肖億翁

黃河清并序

近有南人自北歸紀之於籍云某日渡河土人謂丁丑歲四月黃河清戊寅歲十一月又清數旬古語曰黃河清聖人生吾大宋人也知大宋而已然則中興有日矣獨惜夫人之生唐末年者歷五代八姓五十五年至國初僅七八十歲首尾生死於唐宋之間爲七代之民何重不幸耶爲馮道者比比皆是我宋豐水有芑之仁陶化斯世三百年彼忍哉彼忍哉今黃河清矣汝輩何所逃乎吾謠之曰黃河清大宋中興天下太平故作黃河清詩曰

丁丑戊寅歲黃河兩度清但教大宋在卽是聖人生亘古理不泯中天日轉明這番戡定後世世永休兵

自題大義集後

長夜漫漫發浩歌生民塗炭果如何中興車馬修壞在變雅君臣廢缺多赤幟開明

新日月青氈恢拓舊山河誓崇忠義誅姦逆田海雖遷志不磨

郊行卽事四首

一變太平業民生若失巢之牛耕瘠土多馬壞荒郊花圃半栽菜穀田今長茅幡然欲
深隱遠與世相拋

其二

五年前事別一說淚滂沱 帝業雖遷鼎人心未倒戈日光疑白晝天影愧青波青立
宮塘路風前慷慨歌

其三

癡立若忘歸欲言還又訥時危恐懼多國破繁華歇黃葉辱吳山綠蕪欺魏闕兩峯
流水聲偷哭漢宮月

吳山在行在大
內鳳凰山側

其四

雲禁江城晝色陰可憐寂寞讀書身風霜虐命四五載雨露潤民三百春雁落愁聲唯
送淚馬馳怨迹豈成塵如今不獨桐江上新着羊裘又一人

觀顏魯公帖

吾拜魯公帖凜然氣如生終身大唐臣千載名崢嶸愧彼今之人獸心蠹天經

苦懷六首

我行荒野閒風埃苦浩浩嗟汝後生者惟恐不晃老世事如霜木顏色盡枯槁愁來不
即死反爲命所惱今人眞小兒語話尙癡倒不辨親與讎得食卽爲好焉知父母心茹
痛傷懷抱難報三春暉滿地皆芳草

其二

滔滔流波瀾百川俱頽靡競羨呂望貴獨欠伯夷死小恩尙思報大義反忘耻 國家
三百年果何負於爾

其三

南山一何高支脈遠不斷巉巖峰巒間松柏蒼翠滿面陽地力盛萬物發新暖我欲飛
至之惜哉羽翮短

其四

昔爲天上雲今作地下塵
躑足屢哭懊痛惜六尺身
父母生我時教我爲賢人
生得男兒骨一死亦精神
疇謂迫中年隨影濁水濱
跼蹐走殘命語颯氣不伸
固知復繼剝霜雪天地仁
願得一脈暖散爲天下春
援手水火間以道拯斯民
俾知尊卑位萬世不湮淪

其五

我命而爲人形異禽獸生
所以異者何不越綱常行
斯道如日光千古同一明
胡爲舍白晝墻埴塗冥冥
盲伯夷聖人遠雙瞳空晶
晶悲風吹語斷天濶青山
橫

其六

古人立志高爲義不爲已
今人所見卑獨爲貧賤耻
不義富貴生寧以餓而死
遺體非不重所懼悖於理
我稟清淑氣生而秀爲士
讀書三十年頗知六經旨
質之以人道所言皆如此
奚乃滯風塵爾汝弄歡喜
浙山高蒼蒼浙水清瀾々
三嘆動遐思清風響兩耳
暫焉深隱去長鑣訪園綺
敬俟時之清終其天倫爾

已卯十一月朔又夢食梅花夢中作

雁字高高兔國斜，濕光飛露沁流霞。
狂來清興不可遏，喫盡寒梅一樹花。

遣興二首

獨笑或獨哭，從人喚作癡。
生惟嗜食菜，貧亦耻言錢。
清興遊空外，孤愁抱日邊。
所憂無別念，雁又犯南天。

其二

傳家曾受易，所得亦良深。
今古豈二道，死生惟一心。
顛風掀曠野，癡雪厄寒林。
不改隱居操，扃門自鼓琴。

送僧游西湖歸永嘉

大地瘡夷痛正新，南歸不避雪紛紛。
柳邊人憶一湖錦，松下僧閑九里雲。
熟路有緣家易到，空經無字世難聞。
菖蒲澗水濯雙足，雁蕩山巔曝夕暉。

結交二首

鳳鴉同爲禽，麟虎同爲獸。
以彼善惡殊，致令分去取。
惡者僞似善，惑世不可究。
唯在行事間，以理觀於久。
或不近人情，避之如避臭。
君子重結交，芳名垂宇宙。

其二

伐木義不古，僞敵溢顏面。交接無真情，面是背乃變。疎則易爲恩，密則將成怨。當學晏平仲，終始保相見。

隱居謠

布衣暖菜羹，香詩書滋味長。

醉鄉十二首 并序

醉鄉箴附

余偶得醉鄉題，忽興動累十二章。不其泛乎？素不能以酒醉於醉鄉，乃以詩醉於醉語。是亦真醉於醉鄉矣。或曰：君兩年來不作詩，今何爲而作耶？曰：予今不求人詩，亦不與人詩。人與詩不愛人求詩，亦不與不倡以先之。不和以從之，執是數者已確。或意情累年不作，或興動一日數作，皆天吾天而已。或鄙之亦不辭。

破得愁城了，仍還太古風。渾然無事國，不與世相通。地邁華胥外，天歸混沌中。盡哉蠻觸氏，苦死角英雄。

其二

狂藥蛻凡骨疑來別一州形骸閑若棄風壤曠無憂屢有聖人至徐逸曰酒之清者曰聖人難同惡

客遊

元結曰不飲者爲惡客

所交惟陸諝

唐子西有陸諝傳

落魄老菟裘

其三

盎然非世境樂意渺無垠暖骨通仙處寒冬能幻春眼空天亦小心淨月逾新昔者李太白於茲竟瘞身

其四

太和國土裏風味極清柔意外竟忘世胷中不夢秋日蒸春氣湧地漾水光流此卽神仙窟何須更十州

其五

獨到至樂處于于自在行身心全去礙骨肉若通明劫外冥天地空中一死生却觀凡世界眇爾幻漚輕

其六

誰居此域作生涯偏許劉伶畢卓家屋影空空天渺漭燭光閃閃地橫斜春紅軟玉頰

衣樹秋碧流波漾纈花接壤或通三島路任地苦海事如麻

其 七

萬里和風眼底面陶陶樂土隔飛埃暖浮花思春初透紅漲霞紋潮正來長駐童顏驅老去不教玄髮受愁催舉頭闔闔手能摸更欲乘風過九垓

其 八

風物青妍地不塵一天無盡四時春此中正屬忘懷境來者多應避世人

其 九

紅潮初上玉船空假道青州一水通相去塵寰千萬里不愁日夜不春風

其 十

大哉春宇溫厚凝聚靡有沍寒暖於吹煦厥俗孔洽恬無憎妬高陽之徒歷年熟路惟楚屈平欲來莫赴我至是邦妙莫能喻至和滋形神與天遇載朗笑詠金玉韶護至清之氣噓呵風露喜若悟道默契玄趣陋彼市朝喧隘弗寤願我遐年克壽厥寓

其 十一

天道何冥冥委形闢空香曠劫土坦平冲氣藹雲秒不入禹封疆拓地八荒表空洞無邊涯一切境界小骨柔春香濃目紺夜光瞭洪荒上古前命不爲愁勦卑哉蒼生愚役心顏貌愀窗猴狂搖搖野馬走擾擾隨竭冲融膏渴命竟枯天奚不來此邦軟坐廟幽渺剝刷膏盲俗滌濯肺腑皎騁駕無可遊一生事足了

其十二 醉鄉行

窮冬驕寒地凍裂北望朔方常下雪五臺積古雪不消鳥獸毛毳結凍血江南昔有酒如澠蔗漿麟脯相憑陵朝廷有道四海清既醉覺鷺歌太平九土夜市徹天明樓紅陌紫喧簫笙豪氣一飲一千鍾喚得國裏春風生千金少年百花眼左右捧擁上天行戰鼓聲多瓦欲飛從此百姓無寧時龍嘈鱗舞鼠變虎恣意反覆弄風雨如今寂寞不救飽饑饉眼晴生秋草空欲拍弄百斛船莫羨醺來曝背眠何如我入壺中遊喝雲開破天外天翠錦幃幕車渠土八面雪白淨無煙水玉雙闕瓊膏填使得五行顛倒顛坎離嬌春中央宮俯現摩醯王王仙手執乾坤萬化柄斟酌混沌殼中髓嚙得半掬碧色雲夙根無明百雜碎萬緣俱空恬無爲四肢馥郁紅玻瓈自然氤氲大和身融融洩洩先

天春形化爲氣輕於霧飛御慈眄福下土金相朵朵鮮綠雲花螫綵衢跨空住八十一
天開玉殿天天互透長生路愁湧醴泉雨甘露孕牛產麟繅蛟舞九苞鳳凰對舞鳴鈎
天青雲臺璫音勅取龍猛大士藥西土龍猛大士有藥能點大山爲金相傳今尚有龍猛金焉盡點大地變黃金娉娥擲弄
團圓雪拋向下界懸作月銀光倒潑白冷明笑吻霏霧飄香水戲擲火丸煎海乾珊瑚
萬樹紅斑斑抱出懶雨活龍帝拔髯痒鼻激噴嚏鼻氣環空掛白虹垂脚東貫太荒東
八八翠衫篷萊兒舞撒寶花雙逶迤千丈白眉老神翁前導萬從開天倪徑出盤古頂
外行却風浩浩空掀轟呵暖爲春吸爲冬濁世甲子剎那中數數老松化石了錢鏗小
厠半刻天我之大醉八萬四千歲小醉三千六百日世上幾回漢與唐苦於爭戰悲猶穢
萬國黔首行飯囊鬼貌藍色心茫荒狹步蹙躑躅埃裏崢嶸拜天祈壽長氣濁訾歎不
青響啾啾碎聲羣爭攘生來不識快活國紛華外勝奪心王晝夜火燒菩提樹胷井索
水喫且僵暗地荒年苦命活籬條戚施瘡痍傷貧者逼迫富者狂一窪血氣六賊戕眼
空天上金銀落壘瓊架屋鐵築牆莫知仁義爲何物冷笑詩書今不香沉酗私欲反爲
嫌醒說青山白雲人羣昏駢駒搖不覺強語以道必生嗔忽笑大笑休休休回視若輩

愁如讎揮手長揖永相謝干刼萬刼逍遙遊

醉鄉箴并序

君子之至是邦庸以養恬小人之至是邦適以滋亂此鄉垣夷厥土惟青壤九州之地及之故其人物皆有士君子之行焉彼之游泳道涯入於無量之域雖忘形骸而禮不亂身其景禍樂之於內居之久而安或失其道瀆常經鼓洩其孽氣見之於外卒莫寧處非醉鄉本俗也雖然亦足以別君子小人歟後之入國問禁者其審於是箴曰

維人之生所主者德瞿瞿良士藹然溫克其天其游養和於默勿爲氣奪遷其帝則爾敬爾身天命難必罔越乃行終其永吉

德祐六年歲旦歌 庚辰歲

天運無情歲事新 大寶虛位孤王春
晝出銜恤夜夢哭 皇皇五載臣無君
南望 二王未駐蹕北憶 三皇猶蒙塵
祲侵蝕月地軸折冤氣上騰霾蒼旻
百姓茹痛苦徹髓 大事未定焦如焚
我寧久處遯閩中 遽忍終死爲逆民
大哉父母之遺體與生俱生仁

義身天鍊精金鑄我心上籀忠孝兩字文痛憶我君我父母眼中不識天下人不

變變變不不變萬挫以死無二心醉唱海嶽尙翻動不信不滅犬羊羣或謂逝水不可

復叱我癡忠空愁翠焉知漢絕十八載光武乃與春陵兵卽此一語斷世事仰面再拜

淚如傾西漢絕於平帝元始五年乙丑歲至王莽五年壬午歲光武於春陵起兵乙丑至壬午恰十八年至乙酉年光武始立國改建武乙丑至乙酉相去二十一年東漢始與詳見漢史今日德祐六年歲旦歌

乃祥興二年歲旦歌也太歲則庚辰也南國正流在天一涯亦未嘗間斷焉我陷虜雖六年其實則德祐之民故曰德祐六年歲旦歌心愁欲絕日掛空碧滿腹不平氣何時遂於一吐耶杯酒光風霽月之下相與歌吾德祐六年歲旦歌吾之願足矣或疑不不變三字蓋痛切語殺之辭非謂不能於不變也

苦雨

霖霖厄晴光胃臆推倥傯雨嘯陰風砭中肌骨痛物象各憂囚坤與一瀕洞死禁朝陽升私竄陰權弄我剖一寸心灑血聲大慟卣天開光明晝夜永不霧

勵志二首

炎正遭中微冠屨紛倒置四壁皆楚歌癯瘠何凶熾萬命墮荆棘身與豺狼值攢眼刺荼毒地無隙可避君子餓欲死爲時所唾詈白晝行夢中更相問憔悴我鬢茅茨下有生痛自愧寒燈弔老影惻惻不遑寐憂抑併填膺反覆論此事嗣君尙幼冲厲階誰

所致權奸弄破國珠玉亂走口曾謂頃刻間一蹶失神器風沙犯天顏生死一葉寄勢
去若瓦解哀告不可譬太廟櫪胡馬太學巢胡吏殿閣奏秋涼羣羣走魑魅淒風吹宮
花春不肯明媚哀笛破深愁滿目新亭淚 我朝聖明君一一皆善治涵育三百年豈
無忠義士我讀 我父書頗曾識大義無以死恐我死亦心不二殘生習膽氣怒頻
裂臂或時坐如死突眼睜相視 先王澤未泯中興斷可冀仰呼籲不平挺身據大思
四方皆風動德化仍漸被春秋生殺權華夷有定位後有董狐筆當嚴於載記爰以明
人倫永使勿顛墜

其 二

大哉天地經森然不可踰 聖人治天下綱常安厥居誰謂遭大變干戈血模糊天地
忽破碎虎狼穴吾盧毒氣孽萬物草木俱焦枯我爲 國之臣於義當捐軀受死不爲
痛 國家終何如念此迫我心萬劒裂肌膚骨腐尙銜冤且爲 國家圖鬼神果有知
聞之亦歔歔

春日偶成五絕

山塘遊舫接荒城縱有笙歌耳不清深憶 國家無事日人心和氣是春聲

其二

曉來怕上最高樓春盡時光只似秋草木荒寒生意澀風腥雨膩一天愁

其三

郡縣荒蕪哭暮笳憑高望不見天涯如今揮淚灑枯木南國春回生紫華

其四

天地腥羶社稷隳萬邦赤子病流離幾番曾共秋風語說得虛空亦淚垂

其五

百萬胡兒犯 大朝 奔南 狩北恨迢々我非辦得中興事一點英靈死不消

寫憤三首

偶一夕枕上苦吟不就忽於夢中吟得五字云翻海洗青天正屬對間爲人喚覺則
天已大明矣今足之于後

自許志頗大頻歌慷慨辭攢眉無說處仰面獨行時豪傑心猶蘖死生命若絲當今欲

平治舍我則云誰

其二

開眼看不得愁來只自顛百年萬憂苦四海一腥羶歎命巧相值觀時痛可憐却慙深夜月猶忍照胡天

其三

朝廷惟禍亂民物苦顛連晉帝渡江日唐皇幸蜀年剖雲行白日翻海洗青天辦得大事了胷中卽泰然

偶成

郡國殘民少君王何日歸不知秋雁後猶得向南飛

無題五首

屢問北來者相傳盡不同三宮在何許萬姓墮愁中春草活腥綠雨花啼慘紅人間至微物今亦怨天公

其二

自古無茲難 戎朝今遇之小臣慙逆士大事決成期却壞六龍死天荒萬象悲時哉
弗可失奮發莫遲疑

其三

一天悽愴事此恨極難裁骨縱已成土心終不肯灰毒蛇噓樹死怨鳥哭春哀處處山
東老懸情漢詔來

其四

海茫茫望不窮黃茅白葦渺陰風鳳凰高遁屑霄外豺虎橫行大道中 九廟傾頽
郊祀際四方禍亂國家空于今建武重興漢誰是雲臺第一功

其五

鞠躬盡瘁弔無君滿耳冤聲不忍聞醉去忘形猶蛻骨怒來嚙齒欲穿齧腥風淪曉春
應怨癡霧霾空路莫分熒惑星明聖人出頻頻中夜驗天文

和 文丞相六歌 不次韻

我憶 三宮幸朔方天顏皺黑鬢髮黃鬼風尖尖割肌肉驚沙撲損龍衣裳羣黎命死

北魔手世界缺陷苦斷腸小臣翅短飛未得望破癡眼愁更長嗚呼一歌兮哀以傷白
日無光天荒荒

其二

我憶 二王血淚垂一絲正統懸顛危士卒零落若霜葉陣前將軍今有誰以舟爲國
大洋裏萬死一生終安歸至痛無聲叫不響皇天皇天知不知嗚呼再歌兮歌孔悲風
雨驟至晝冥迷

其三

我憶 我父在日時叱我癡鈍無天姿旦旦灌漑仁義澤靈臺豁然開光輝夙却孤露
命濁世王事鞅掌生無期一憶 父 母教我語逃罪無地死亦遲嗚呼三歌兮淚淋
漓 君 父不在倚賴誰

其四

我憶 母氏兮聖善勞勞苦家事手生繭 母後父死十五年教我育我思不淺我雖
貧拙志不屈清氣稜稜秋塋骨至今一粟一縷絲皆是 父 母流傳物嗚呼四歌兮

痛惻惻皇天后土無終極

其 五

我所思兮 文丞相英風凜凜照穹壤失身匍匐草莽間屢迫以死彌忠壯虛空可變
心不變吐語鏗然金石響相公骨朽化爲土生樹開花亦南向嗚呼五歌兮併悽愴望
公不見愁泱泱

其 六

我生我生何不辰血淚化作妖花春平生意氣若風雲何苦戚戚悲呻吟狂來一呼天
地動萬物鼓盪俱精神天上真火滅不得灼爍大地生光明嗚呼六歌兮歌聲青海嶽
瑩潔日月新

久雨後郊外獨行

新秧遭水毀歲事正關情日沒虎狼出城荒荆棘生清流不可污古道竟誰行闊步獨
歸去茅簷月自明

追 獎并序

毛惜惜高郵軍妓也 理宗朝榮全據高郵城叛召惜惜佐酒惜惜怒叱之曰汝本趙官家健兒何敢反耶吾有死耳不能爲反賊行酒榮全以刃裂其口立命鬻之罵至死不絕聲嗟夫今之男子挺挺讀書學爲君子者反蕩然掃地矣不知此婦人旣失身汙賤果何所學何所見而臻於是吾豪傑士也崢嶸之氣不爲世變消礫此國家仁義涵養之所致其敢負 國家乎聞此風者頑夫廉懦夫有立志不待文王而興可也扼腕時艱追憶惜惜之事今實不易得故賦以美之

誰謂匪人賤猶懷事賤羞挺身持大義正語叱狂酋名在春逾艷骨香花不愁有靈知
國事地下笑王侯

詠懷二首

鳳爲百鳥王孤飛無其友覽德而來儀千載不一有云胡德之衰囚身狎鷄狗我當愁
來時散髮狂叫走歷歷訴此苦大空亦肯首

其二

精衛雖至微銜石尙填海一點至烈心千生萬生在我誓銘于天語大莫能載萬萬雷

中興集

靈誅此盟亦不壞
劃然笑一聲
今古生光彩



中興集卷第二

景定詩人三山所南都思肖億翁

我苦心吟事二十年矣 德祐前詩僅存一二記序等作則盡亡之亂後所作幸猶存焉今陷身不義盡傷于心期剪滅此而後朝食凡有所作意在大事不敢橐籥風雲月露之妙鑄爲獨樂之辭然亦不知其果爲詩果不爲詩也自 中興集黃河清以下隨得隨入更不刪去主于述懷不以辭語爲選擇今所作無題者俱以礪之一字次第目之礪者言淬礪乃志決其所行也漢頌逆莽功德者四十八萬餘人今又過之唐顏氏之門死於賊之刀鋸者三十餘人今無以尙之何從逆者衆盡節者寡歟晉卞壺父死於君子死於父偉哉我銘 父母之教于靈臺與生俱生與死俱死而不忘者也天高地下日照月臨有違家訓雷其殛之

一 礪 庚辰九月

愈久愈不變一忱生死俱獨行天與語枯坐石爲徒血汗衣冠國冤浮盜賊區何當洗
兵馬終古統炎圖

憶前輩二首

昔在先皇帝理宗當陽四十年文明照天下俊傑立王前一自胡兵入俄驚漢鼎遷
致今人道亂空谷遁遺賢

其二

治世衣冠盛人材極典型開心呈日月吐語走風霆氣象近三代文章出六經今焉不
可得四顧一冥々

續洗兵馬

遭時不祥厄陽九垢面蓬鬢喪家狗四夷交侵小雅廢率其子弟攻父母封豕長蛇亘
人域天子下殿跣足走凝碧池頭樂最愁達昌宮裡花亦醜三精霧塞黑瞳々天破
地裂一無有誰執弓矢救日月仰泣旻天大號吼賢者不入勝母里義士恥飲盜泉水
丈夫立身乃大事一失此足死亦恥當知孔明早鄉舉歸然三代占君子呂望蟠溪釣
文王乃是漢唐人才爾到今大壞不可救鳴泉破鏡咀唇齒高瞻双目視天下黔首渾
敦狀如鬼龍堆大漠宅鳥獸夷舌捲響鑾侏離不類人形舞百怪錯亂天命災群黎營

州羯狗

祿山也

猪龍形詎能篡有唐丕基太子即位靈武日天開萬仞磨崖碑載定尊卑

奠鰲極一新正朔授人時漸被日月出沒處梯航臣妾拜京師黃旗紫蓋東南興大

火王氣浮晴春勿欺一成一旅微少康猶能作之君班超已著王命論陳嬰王陵卅生
心絳表大冠大敵勇今日豈無劉將軍田野豪傑久延頸一呼而動雲來奔我當率之
欲馳驅整頓乾坤明大倫舊邦新命光前王逆賊汗染咸陽新

二礪二首

愁裏高歌梁父吟猶如金玉戛商音十年勾踐亡吳計七日包胥哭楚心秋送新鴻哀
破國晝行飢虎齧空林胸中有誓深於海肯使神州竟陸沉

夫差敗越二十年越滅吳十年乃伍員語

其二

鈞天夢冷紫宸春臣子銜哀社稷屯一縷血忱開白日兩篇心誓哭蒼旻

謂前後臣渡江子盟檄也

祖逖願興晉蹈海仲連羞帝秦回首故宮闕恨滿山秋色正愁人

題拙作後

我有一詩篇率皆懇切辭但寫肺腑苦不求語言奇矢口吐憤氣焉知詩非詩脆語剪

風露叨々兒女癡昂然大丈夫以身佩安危何時把杯酒大笑伸双眉

三 礪

一礪二礪至萬礪盟執牛耳血爲誓靈臺空瑩白于秋徹底不生乖戾氣皆裂齒碎心
懇々貉之天性寧踰汝我生一双霹靂手終碎此虜爲齏粉天平地成風俗淳一統未
歌故無人

九 日

眼見今朝菊又黃双扉漬淚暗淒涼崢嶸歲月精神發磅礴乾坤意氣狂新雁來時芳
草死歸鴻盡處暮天長後年箭主當回蹕始信山河再屬唐

菊花歌

太極之髓日之精生出天地秋風身萬木搖落百草死正色與秋爭光明背時獨立抱
寂寞心香貞烈透寥廓至死不變英氣多舉頭南山高嵯峨

餐菊花歌

道人四時花爲糧骨生靈氣身吐香聞到菊花大歡喜拍手笑歌頻顛狂憶昔我爲混

沌王洞見末劫壽不長盡召群仙列殿下勅宣餐菊長生方我今化生遊下土一嚼清涼徹肺腑頓令心地豁然開迸出明珠耀今古普入變化妙如意能爲一切主中主塵々刹々黃金身永救婆娑衆生苦

愛竹歌并序十月

吳中承天寺立雪軒脩竹一林極可愛昔承平盛時每游其間屢詠絕句刻題竹上世變之後繫心大事欲此清樂不可復得近至西山忽見竹林脩翠戀々終日實不能去始知痼癖不可除也遂歌之

此君氣節極偉特令人愛之捨不得徧造山水有竹處不問主人識不識朝夕暮々看不足感得碧光透双目一旦心只忽歸去挺身特立化爲玉

四礪二首

壯懷寧久淹藏跡暫竊欄道病人相食時危筆不銛哭衰愁裏命笑粲醉中髯清恠每如是從教俗士嫌

其二

說殺說不醒世人良可歎欣々從北俗往々棄南冠毒露沾膚爛尖風破骨寒願身化作劍飛去斬樓蘭

五 礪

宋鼎終難問元酋莫死爭九州俱是淚一刻不容生舌在身當貴心真願必成但思湖海上誰可與斯盟

六 礪三首 郊外獨游草

一聽茶歌淚即流探茶歌胡曲也更兼風葉響颼々不堪滿地餘殘照併與新□合音問作愁

其 二

又是江空歲晚時痛思 國事獨行遲青山無語青天達吐出丹心把向誰

其 三

操得南音類楚囚早期戮力復神州須知錢鑄忠臣骨繼作微塵亦不休

弔揚州瓊花并序

揚州瓊花天下惟一本后土夫人司之花之盛衰淮境豐歉係焉 南渡前經兵火

此花亦死今遭大故丙子歲維揚陷丁丑歲此花又死孰謂草木無知乎上天福正統厭夷狄於是見矣

南土新飛劫火灰瓊仙戀國暗驚猜定應攝向天宮種不忍陷於胡地開花死青春禽鳥笑城埋黑氣鬼神哀一朝枯朽變高樹傳得歡聲沸似雷

七 礪

天生忠義性習俗豈能移道在國常在我知人不知眼戀堯曆象心醉漢官儀堯漢俱火德前日喃喃者今誰語及斯

八 礪三首

黃道蠹陰晝蝕光野浮冤氣白冥茫世無聖主天應笑時有忠臣國不亡萬刃攢身終莫變一誠銘骨豈能忘休嫌重複叨々說未奏膚切正斷腸

其 二

生得貞心錢石堅肯將識見與時遷淚如江水流成海恨似山峯挿入天慷慨歌聲聞屋外婆娑劍影落燈前篇篇字々皆盟誓莫作空言只浪傳

其三

憤氣填膺奈苦何，千生萬死不消磨。
夷齊道喪綱常壞，湯武兵興叛逆多。
天外遊心窮碧落，風前注目寄滄波。
此時此意那容說，環顧斜陽一浩歌。
謂人臣篡國自湯武始，今胡人則犬羊耳。

梅花

寒結癡陰慘物華，莫將憔悴聽胡笳。
明年無限風花在，奪得春回是此花。

九礪

忍死以待旦，蹉跎歲又殘。
墮身因陷阱，盡命笑衣冠。
月死虛空黑，春枯草木寒。
牀頭雄劍在白氣，夜盤々。

辛巳歲立春作

大辱痛於死，含哀弔歲華。
叫雲聲草檄，戀闕夢宣麻。
地走人形獸，春開鬼面花。
年々北去，婦馬上笑琵琶。

覽鏡

朝來一覽鏡，抱負頗崢嶸。
矚貌古煙霞，氣詩新金玉。
聲郊原常鬼哭，風雨自雞鳴。
所喜不

靴笠巍冠傲屣行

獨遊雨月

吾非好獨遊無與吾同者不行衆所行驚天下逆哉一人昔辨而今啞吻涎流腥羶變尾面不赭若曰汝爲人寧不識取捨止夕勿多言清風生四野

十礪

屏氣處逆阱衡慮盡奇謀指日誓血語高空開青愁決志揭大法一洗天地羞永使臣子輩恥列僞逆儔美俗薰古德至治昭皇猷一統萬萬世海宇咸蒙休

同

一刻積一日因循已七年

自乙酉陷虜至辛巳已七年

孰云天道邇不鑒下民冤海陸頻征戰城地更

變遷吾君幸何地數禱紫微垣

十一礪四首

錢塘帝王都宮闕高崔巍盛治譎無外鼓舞如春臺咸淳聖人去山崩龍虎摧彈指變晦冥鎮園生劫灰丈夫吐一語霍落飛風雷直挑四海水併走天外來手濯天地殼永

刼絕纖埃喚醒群盲兒歡聲双眼開

其二

我本漁樵徒山水足嘉遯昔也爲鳳凰今焉乃鷲鍾反思生爲人虛食 國家飯詎甘
死賊手措口違公論孤忠破衆逆彌久氣彌健決當乘良機爲 國行天憲勇往直無
前一舉四海勸談笑解倒懸盡釋下民怨生或不就緒死當償夙願罔使竟食言却々
抱長恨

其三

姬發誓孟津集者八百國當時盡棄商喜受鉅橋粟獨有首陽山不生周草木至今擁
天高與商終無極

其四

素持不殺戒一視齊窳親今遭此大惡不報無天倫况聞曾子語不取姑息仁實爲不
得已挺身事經綸苟能悟昨非赦汝改面新資固變詐者我怒佛亦嗔直期後世後弗
忍爲逆臣惟願吾與汝同歸天德淳

十二 礪

攀龍斷髻哭不回鼎湖仙去下民災一身肉痛愁銷骨雨臉顏枯瘦入腮誓以匹夫紆國難艱於亂世取人才屢曾算至難謀處裂破肺肝天地哀

題明皇按樂圖

誰準鸞輿向蜀行梨園弟子歇新聲及知凝碧池頭事難得樂工雷海青唐史凝碧池上樂上雷海青向西嚮哭爲祿山所殺

憶夢笑歌

五月二十一夜夢遊西湖上舊遊宛然行至戎馬蹂踐之地憶今天子不在咸陽宮大哭隕絕而覺遂作此歌

金輪天王中天壽赤龍夜哭玄蛇吼仙人不忍辭漢去青山照水生愁醺雖貧亦有買醉資甘美不入孤臣口死後骨消恨不消歲々暗逐春風上新柳

元賊謀取日本二絕

涉險應難得命還倭中風土素蠻頑縱饒航海數百萬不直龍王一怒間

其二

海外東夷數萬程無讐於韃亦生嗔此番去者皆銜怨試看他時秦滅秦

十三礪十首

我有一卷書

即二盟也

仗之以爲命所言非奇辭教人歸于正昭々靈台閒生死明於鏡願

爲大醫王普治衆生病

其二

窮陰有巨蛇蜿蜒數千里磨牙雨毒霧聞其氣者死我心不回邪縱毒徒爲爾終將飛劍去一擊化爲水

其三

哀哉大數乖妖魔填虛空劫雨壞世界欲與大海通群愚捫空走奪命鬼手中陰極集萬惱願天生暖風

其四

蒼々南山松特立孤峯顛身此至正氣性於太初前流泉近靈物鬼飲之亦仙况抱長

生寶永蔭娑婆天

其 五

大哉萬物母清淨光蕤々獨尊而爲帝天地亦其子我見我之身彈指魔王死歡喜獨
自笑清風萬々里

其 六

北荒騰黑陰飛妖蝕漢日閭闔九重門老胡騎馬入萬世熙明殿度宗朝殿名一朝韃靼窟韃靼
即今江南荒野間月黑鬼兵出賊也

其 七

嗟汝兒女曹至蠢亦孔醜笑面心搖々欲進乃却走慙癡弄盲語捧酒祝鬼壽傷哉復
傷哉醒眼頻搔首

其 八

偶背文明時萬事暗蒼莽詔汝一世人父亡子焉往良心油然而生千載垂清響與道同
周流光明塞穹壤

其 九

王道一陵夷風俗愈卑隘至於讀書者見利直下拜一或持高論聚笑議爲恠誰其振木鐸與世開聾聵

其 十

夙生抱一誠天亦莫能破云胡白晝中開眼而死坐猛然風雨生一叱萬邪挫卒使世上人子孫永相賀

題番梅初舊所藏錢塘王畿圖二首 下月

陰山腥馬蹂京塵鎖殺宮花不識春笑問錢塘江上月如今誰是去邪人

其 二

撫膺喟國問蒼々郭喈聲中喜氣昌儉報故都忠義士趙家天下又南陽

十四礪二首

法駕遙巡六載餘農桑煙火頓蕭疎深山大澤精靈哭赤縣神州鳥獸居天下黃金歸朔漠南中白骨蔽郊墟漳泉數郡屢反正牘有忠臣野史書

其二

六合漫空一網羅，驅徭椎剗極煩苛。星辰錯亂曆無準，天地陰寒氣不和。漢室公卿周勃少，河梁朋友李陵多。覲然發難悲風過，渺々吳淞捲白波。

十五礪二首

國家今板蕩，舊物一微絲。至苦說不得，長懷病似癡。人心危陷阱，天理過著龜。賴有二盟在，寧無吐氣時。

其二

王畿三輔地，誰信捲風沙。南貨北填市，北人南住家。亂招城聚虎，毒入土生蛇。說着未來事，戰爭寧有涯。

城中今有六七虎，或東或西，一暮即出，頗有見之者。

十六礪

双眼荒々不寐時，冥搜俊傑募夷齊。識符鐵券虜當滅，夢出玉青天亦低。城裡月明聞虎過，人間夜久望鷄啼。深憐舉國巔崖底，誰搆懸香萬丈梯。

先朝常於蜀中掘得武侯錢券，有胡滅漢留一半漢滅胡一人無及。

依舊朝錢塘之語，當應今日之事。

六月大雨後作

推上滄溟犯玉京，業龍鼓怒恣縱橫。青天忽破鬼神走，黑雨驟來山嶽傾。混沌重新開覆載，虛空頓覺發光明。如今清淨渾無礙，一日南風萬物榮。

二唁

穀梁曰：失國曰唁。并序。七月。

丞相陳公宣中

德祐二年二月，平章賈似道出師敗績，丞相陳公宣中當國。又以京庠上書議之，抗疏而遁。太皇屢降詔趣入，至九月始歸朝。德祐二年正月，賊逼行在，陳公力請三宮不肯遷，駕遂與張侯世傑、劉侯師勇奉二王迤邐南奔。南海公嘗夢二日相圖，其一墮地不見，其一墮入袖中，喜得奇兆。數々以耐字死諭諸文武百揆，後勢不能統制，張侯又疑恐左右所賣，托失風奔占城。俄而占城亦降於韃，占城遣百二十人兵卒服事之。寓監紼意又遁，而奔閩。婆國嘗遣使齎香一器，遺張侯約以挾外國兵來合。公未至，張侯已敗棄崖山。莫知所之。先是，景炎二年丁丑歲，公以泉州糖、斃貯空名省札數千道，遣戴_思僞作糖商，販糖來吳，密諭使臣呂大升徧誘浙西數

州平日有戀國之心者皆旋墳名補官呂大升用心布置有法遠近皆孚期以戊寅歲正月二十四二十五掩其不備一舉得吳有姚姓者以謀軍器于其主高氏高乃告于賊酋拜都至正月二十四果有領兵來者以賊有備俱陷賊手自正月二十三早闔城閉門汲爨俱絕一聞人聲賊即擒而殺之又議舉屠城幸而免越七日至二月初一午後始許開門予家寓于吳身親此苦後大升等俱受極刑公令呂大升與諸郡響應乃夾攻之亦爲良策彼高其姓者身本南人反以告賊陷誤大事生靈受禍不已高之彌天惡逆可勝誅哉且聞公至南海諸國有讓王位與之者公亦不受公始五十二歲事業豈止於此或傳在貞臘之間併集外國兵來徼臣昂首望東望南一旦從天而下盡復 藝祖 高宗境土寧不快哉

相國生東甌應識海壇沙

古識云海壇沙漲温州出相近年海壇沙始漲陳公果拜相

早觀上國光辟雍飛聲華咈雲罵姦

權上書言姦相丁大金被竄

遠竄走天涯十年登要津文彩絢晴霞中台勢將坼

平章賈似道出師敗績

大拜宣黃

麻國步正孔棘有塗相牽牽鬼盜殺機弄平陸閩龍蛇黔首心不正居然中陰邪蛛絲網黃屋六宮飛嬪聖公奉 二王奔脫命毫髮差瀝胆酹上帝哭斷口大呀南邦血糊

地春深草不芽，鬼氣射死樹。腥妖幻毒花，萬痛集如薨。百恠鳴如蛙，蝕盡朱垠天。國
寄海上槎，始知上色玉。潔白渾無瑕，垢衣懸相印。獨御指南車，近寒凍不死。微夕命一
建刀圭，反魂丹陽和。匝邇還生擒，左賢王刳腹。鹽爲肥，却視舊朝士。一一誰忠嘉，萬古
虛空中一僞。不可加俟我王師來，動地騰喧嘩。雷霆破惡逆，四海仍一家。

少保張公世傑

陳丞相遶海而南，懼爲人挾，以授賊。先托失風奔占城。少保張公世傑擁廣王即位於海外。改祥興一年己卯歲也。正月賊酋烏馬兒兵犯崖，我軍與之轉戰兩旬。至二月初六，我軍不幸而敗。所餘五百餘巨艘，賊軍四面圍布，期必得。祥興皇帝賴張公不肯叛，勢在必死。忽天上黑氣化爲龍，見蜿蜒于空。市賊軍爭覩爲大異，張侯奉祥興皇帝，俄乘機死戰出賊重圍矣。所存惟十九隻巨艘，賊望洋追之。數日竟不得先賊酋張九萬戶。本亦公之姪數夕密說之叛，公泣而言曰：「我嗣君置之何地邪？三軍亦不肯我惟有死耳。」數與賊戰，雖伶丁海島，氣實不餒。非獨忠臣亦爲良將，累遷上秩。此不詳知，故不書。獨聞曾除少保，其裨將周文英降賊，謂公已死，乃僞說邀功。

實未死也公始來勤 王國人俱疑之誠誤矣陳丞相張少保伶仃大海中人豈不能奮取以授賊二公忠烈動天地有德感人心所以無萌是念者今俱莫定其所在昔在太平盛時不得拜二公于馬前一識雲臺之像深以爲惜但人心未改天命豈終窮耶予日俟之予日俟之

將軍本北人歸順年已久擢身將校中腰綬中國綬身潤白玉潔面獐黑鐵醜剛勇有武威功出衆人右一朝天柱折當晝豐其部陰陽反鐵炭梧樅賊杞柳公卿文章士靈醉馬乳酒末聞天地間生死反噬狗幸有張將軍強哉氣赳赳生死不攜異寧受奸宄徂平生鐵石腸明白照九有熒々赤伏符百拜懸右肘謀畫入微茫僵目搏撐口死戰拓山開高擎日月走剖心餒龍離淋漓血双手聖火壽綿綿凡水焉能洩瞬目出死關命在事非偶張巡埋骨地頑石變瓊玖白光射天門璀璨奪星斗英氣磨不壞生公踵其後播蕩大海外若子死戀母屈指我世祖建武又乙酉光武乙酉歲中興爲建武一年今歲辛巳去乙酉歲只四年惡獸腦百裂始識獅子吼天風吹新雨濁剗淨無垢

辛巳夏七月

辛巳夏七月初五日正午太白燦然見太陰亦俱覩索曆驗其次太白躔在午兵爭周分野天下氣當吐敬以詩識之儲爲史官補

避暑入古寺

避暑入古寺暫爾遣騷屑心靜涼于秋條然適青悅彼哉誰氏子對奕氣爭傑惜其二低手彼此蔑奇着旁觀發冷笑達呼錯錯々救之不可及流視入寥廓

十七礪

我有眞黃金只作土價賣陪笑徧示人竟無一人買日暮笑歸來反爲衆所恠安得明眼人與之語痛快

昭君歎

漢朝遠人來入使當時公卿短奇計紫青殿內一朵花狂風妬春吹落地命墮窮陰鬼爲侶回首玉皇紫青裡舊愁新愁東海深黃鸝舌破傷春事江南絕色天下誇元賊盡虜歸朝沙或以嫁之鬻僞爵于飛馬背行天涯年深樂與生子女情熱比翼忘咨嗟果知禮義不忍去亦有一死魂還家 德祐百官人稷契腹飽理學縱橫說尙棄 君父

從背叛乃教妻妾學貞烈男兒或老不曉事女子正少欲守節天生至性教不得時危
罕見人中傑能盡婦道能誨兒王陵之母王凝妻世間婦人誰及之空恨昭君上馬時
顏色日老單于死萬里魂歸身不歸廣寒嫦娥今塵土應見青冢双淚垂

十八 礪

挺々大丈夫爲一世準則如何出處間終始不明白四皓本周人多爲漢一出不終爲
周臣身與道相失僅安漢社稷暗墮張良術惟我則不然一身無二適縱別生聖人亦
當死深密我出興 我朝舊都建皇極今力未能之晝夜禱空碧宣王車馬來一見死
亦足

哀劉將軍并序 八月

德祐一年十月虜復攻常州時步帥劉公師勇守之常州素無城壁外濠如市河僅
恃排梁木一重而已先屢與之戰皆勝至十一月元虜大勢合圍月餘其回々砲甚
猛于常砲用之打入城寺觀樓閣盡爲之碎廿一廿二間直攻西門敵之不去四
門殺入一城盡死劉侯倉卒間衣胡衣笠胡笠同十餘人騎馬以通事者給賊盜走

至平江僅餘四五騎徑朔行在隨 二王南奔死于南中韃賊因常州難攻深疑平江有備及得之曰平江鐵城紙人常州紙城鐵人以此可見劉侯勞苦矣浙右之人至今皆口稱剛侯之事痛其不壽不得盡其所長惜哉故作詩哀之

萬重圍裡脫兵氣匹馬勤 王志不分既抱忠貞讐敵國莫于成敗議將軍身前名照江南月地下心啣塞北雲爲痛英雄併消沒託詩爲史筆傳聞

江南絲

江南絲盡入機房欲此虛空彼富強鞭韃別工皆學織程量計日定成章驚心蟠鳳愁應死淚手攀花痛不香貧者只宜巖谷隱草屨櫛葉當衣裳

十九礪

暫爾下生來落身命塵綱高明氣常青貧賤語亦響双足風雲行一心山水想何時了國事方外適幽賞

大宋地理圖歌

混沌破後復混沌知是幾番開太極四方地偏氣不正中天地中立中國神禹導海順

水性太章步地窮足力悖理湯武暫救時謀纂莽操大生逆離而復合々復離卒莫始
終定於一粵自炎帝逮唐堯兩漢 宋傳火德 我朝聖人仁如天歷年三百猶一日
形氣俱和禮樂修誰料平地生荆棘風輪舞破須彌山黑蜺亂下千鈞石銅蟒萬舌咀
梵雲玉帝下走南斗泣中有一寶壤不得放光動地神莫測云是劫々王中王勅令一
下罔不伏燕南垂趙北際忽必烈正巢其地一聲霹靂吹雲飛眞火長生世永世山々
深水々青縱橫十方變化身恒河沙數天壤毀獨我志氣常如新

元韃攻日本敗北歌并序

日本即古倭也地在海東 先朝嘗入貢許通商旅彼近知 大宋失國舉國茹素
元賊聞其富庶怒倭主不來臣竭此土民力辦舟艦往攻焉欲空其國所有而歸辛
巳六月半元賊由四明下海大船七千隻至七月半抵倭口白骨山築土城城駐兵對
壘晦日大風雨作雹大如拳船爲大浪掀播沈壞韃軍半沒於海船僅回四百餘隻
二十萬人在白骨山上無船渡歸爲倭人盡勦山上素無人居唯多巨蛇相傳唐東
征軍士咸隕命此山故曰白骨山又曰枯骸山元賊又一道自高麗往攻倭敗尤甚

虜酋敗歸幾遭虜主所殺並罰陪金銀鈔物威窘且怒虜主又謀復舉攻之耽羅國
方八百里航倭甚近韃已奪據其國運糧調兵于彼爲餉衆窺倭之地倭有五十六
州倭兵悉聚太宰府倭圖載甚詳倭人狠不懼死十人過百人亦戰不勝俱死不戰
死歸亦爲倭主所殺倭婦甚烈不可犯幼歲取犀角剗小珠種額上善水不溺倭刀
極利地高險難入可爲戰守計且今漳州陳弔眼據漳已久地通諸山洞山寨八十
餘所據險相維內可出外不可入以一當百勦韃難算意欲攻出未能年號昌泰未
知擁誰爲主元賊力攻漳不可得又韃攻倭々攻韃卒未已 火德一脈終如何諸
處仗義出者咸有之然恐藉 大宋之名鼓舞人心實私爲一己之謀圖集事功此
微臣朝夕不已于懷者也 我朝列聖無失德 大宋有道之長當粲然復興矣公
縣述隗囂輩燭火也寧敵漢日之大明乎我又夢蘇武與語頗奇遂歌之

東方九夷倭一爾海水截界自區宇地形廣長數千里風俗好佛頗富庶土產甚夥并
產馬船來中國通商旅徐福廟前秦月寒倭有徐福廟猶怨舊時嬴政苦厥今犬羊貪猶熾
瞠目東望心如虎驅兵駕海氣吞空勢力雖強天弗與鬼吹黑潮播海翻電大於拳密

於雨七千巨艦百萬兵老龍怒取歸水府犬羊發怒與天敵又謀竭力必於取已刳江
南民隨乾又行併戶抽丁語凶饑燒眼口竟啞志士悶々病如蠱雖傳漳州氣饑盛又
聞襄陽已大舉割據固足稍伸氣律以大義竟何補縱遇聖明過堯舜畢竟不是親父
母千語萬語只一語還我 大宋舊疆土曾夢蘇武開笑口云牧羝羊今盡乳仗節還
漢欣々然鬚髮盡白心如故一念精烈無不通天地爲賓我爲主高懸白眼混沌前那
肯以命落塵土翻身鼓掌一笑時萬古萬古萬々古

二十礪五百字

素志欲隱去蛻名辭筆耕偶值惡劫來眼界亂縱橫窮北洞窟底竄出老魔精披髮走
如風四臂獠雙睛面發噴毒火直射日月盲一海人隨酒五石瓠爲觥鬼鼓徧空響白
氣幻長鯨夜叉發群機砲々打玉京老仙戰股立手扶鰲極撐畫舫盤古死紫微貫機
槍諸天落淚雨終夜淋漓傾燦人變醜相蠶目豺狼聲餓虎揮翼飛善類誰能撓送命
納彼啖遊魂嘈冤情血凍天下土赭蛙玄蠱雨肥醺饕餮生菌高於楹獨抱深痛蟄數
與死相爭讀史見義事意氣如雲生圖窮七首見今豈無荆卿真孤匿山中今豈無程

嬰獲得九尾龜灼紋橫庚々大寶子傳子垂統無畢程高聲呌亂世聾瞶豁痼醒速卸
胡兒衫仙帶飄佩珩身辭陷陰路火邦即蓬瀛我秉正直心明比日更明豪興凌高秋
磊落人之英決當勇於動持平々不平手劈虛空開身提天地行千妖百裂死萬古一
擲羸獨出娑婆外世界懸空擎猛飛大山來突立青崢嶸初第一峯鬼神不識名樹
粲百寶花石削五色瓊香霏月中髓碧沁秋痕輕天上闢新國以正治八紘大赦統乾
運平心持道衡洪福溥無彊一切命皆亨下界齊拜舞笑賀群相迎愧昔染腥辱悅今
趨義榮淨脫夙骨臭瑩然澄秋泓正性木不壞生死通一誠逆爽殄微塵王氣光大青
犀象怯漢戰草木助晉兵周勃軍左袒杜甫詩北征 趙祀必不絕 宋禮吾足評我
土我百姓永刼心不驚天君坐靈臺誓行前後盟謂前後臣子盟檄也念々死亦咒願寶期必成口
血寧有變浩劫光晶々

宋鄭所南先生自序

思肖生於理宗盛治之朝又侍先君子結廬西湖上與四方偉人交遊所見所聞廣大高明皆今人夢寐不到之境中年命於塗炭泊影鬼區仰懷理宗時朝野之臣中夜倒指嘗數一二名相崔公與之李公宗勉游公侶杜公範吳公潛董公槐閻臣孟公珙彭公大雅余公玠趙公葵陳公韓向公士璧名臣徐公元杰蔣公重珍度公正徐公喈潘公玠郭公磊卿張公端義劉公漢彌章公琰李公韶張公忠恕王公遂劉公宰蔡公範王公邁曹公幽杜公淵徐公經孫蕭公山則陳公昉黃公自然洪公天錫范公丁孫李公伯玉道學眞公德秀趙公汝談袁公肅蔡公抗趙公汝騰錢公時徐公霖文臣李公心傳洪公咨魯魏公丁翁危公科程公公許劉公克莊湯公漢劉公子澄詩人徐抱獨逸戴石屏復古敖臞菴陶孫趙東閣汝回馮深居去非葉靖逸紹翁周伯弼廬柳南方春翁賓陽孟寅曾茶山幾杜北山汝能翁石龜逢龍柴仲山望巖月澗中和李雪林龔嚴華谷粲吳樵溪陵嚴滄浪羽阮賓中秀實章雪崖康孫花翁惟信其他賢能名官豪傑人物老師宿儒仁人義士儻在遐方異縣深山窮谷誠匪車載斗量所可盡如斯諸君子落々參錯天下當時氣燄何其盛哉度宗

登極巨持國士氣沮喪畏禍燃身相尙賣諛平日挺爲君子者亦舌嚙若死宜其人才
咸無稱焉養成德祐莫大之禍不可救藥雖 德祐後忠臣義士亦 理宗朝涵養所致
者 萬乘南遷宗祏塵土臣子之痛終天罔極今忍死暫生期集大事不暇以歡情倩目
調笑風月爲詩人美麗之辭嘯苦 咸淳壬申嘗確然立志悉委舊學已絕筆硯文史
謀入山林蛻去姓名甘與草木同朽盡敬以我還之於無聲無臭之天向非 德祐虜
禍天下無復賦詩作文矣昔上有聖天子下有賢公卿儒士豪傑人物我貌然匹夫可
以隱泯於天游今而上無君世皆賊我當爲天地斯道之主々也者天其綱常於無窮
也卒有聞而笑之者曰豈少君一人哉每厲聲應之曰正少我輩一人耳實萬々不容不
出爲斯道立極也歟大逆熏心冤憤填抑目遇逆事相忤尤覺氣豪不自禁非不知賊
之刀鋸之痛然痛有甚於刀鋸者寧忍避一身微痛不救天下至痛時吐露真情發爲
歌詩決生死爲 國討賊之志心語心謀萬死必行故氣勁語烈殊乏和平興趣實非
詩之正道 先君子嘗謂英氣道之累又離騷亦不得其正但以高古忠憤過之其以
是之謂 先朝作詩皆尙盛唐製作冠冤佩玉五音相宣如大朝會法度森然此皆

我朝祖宗仁義之澤況美教化移風俗動天地感鬼神莫近於詩果能一出誠心公道斥去僞語邪思蓋詩道必致之效舍是而詩恐非古聖人之所謂詩今天下人所思皆邪詩之根本摧裂無餘此爲何時出而言詩爲仁義辱甚矣果欲爲之必知所立身乃可思有幼本不肖且大不孝資質頑鈍授之以學若水灌石了不相入先君子盡生平精力竭其所學癡咒枯木望其必花今若鳥雛能飛詎敢易父母所行之轍恣謬其所之亂後所作詩二百篇固近於正一或不能行其所言願天誅之人誅之彰其不孝不忠僞語罔世之罪使悉聞其惡皆相顧而語曰其父母如是其子如是吾與汝其戒之我晝夜懷懼深思遠計施於言語果無益不如身之於事以風天下暫乎默讎緘鑿屏吟詠事決其必行計獨以謀之神以運之剖析青穢豁如天開位三綱福萬物願俾天下後世莫不知有君願俾天下後世莫不知有父始可以見我父母平日教子之志今忘叨々再四紬繹主于行爲終身誓不求天知不求人知不求心知亦非有所利而爲之蓋臣子之職分當如是也若律以詩去古人法度誠遠矣當憐所遭之時爲何時時之爲戾如是之極也夫以時論之在天不在我以理論之在我不在天時雖異密

不能違於理，至大實可以制乎時。昔父母教我勿違理而行也，素矣是以我自許。我必能集亂世難成之事，時曷能果病我耶？我誓執無終極之終，以終其有終期，無意於國於家焉。願畢天下後世之人一而行之三極之道，至矣盡矣維。大宋三百二十有二年，德祐七載歲在辛巳，陽月望日，景定詩人三山所南鄭思肖億翁後序。

甲辰年三月初八日印
甲辰年三月十七日出
刷版

鄭所南先生徵圖心史

定價大洋參角半

版權
所有

總發行所

日本東京駿河臺鈴木町十八番地

清國留學生會館

發賣所

中國內地各大書坊

印刷者

野口安治

日本東京市小石川區指ヶ谷町百三十三番地

翻刻
必究

印刷所

翔鸞社

日本東京市牛込區神樂町一丁目二番地

編輯者兼

思漢叢書社

